

**PEMBERITAHUAN PERTANYAAN BUKAN LISAN DEWAN RAKYAT  
MESYUARAT KETIGA PENGGAL KETIGA  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : TUAN KHALID BIN ABD SAMAD [SHAH ALAM]**

**SOALAN**

**TUAN KHALID BIN ABD SAMAD [ SHAH ALAM ]** minta **MENTERI WILAYAH PERSEKUTUAN** menyatakan apakah langkah-langkah yang diambil dalam meringankan beban rakyat di Labuan, Putrajaya dan Kuala Lumpur dalam menangani masalah COVID-19 yang belum selesai.

**JAWAPAN**

**Tuan Yang Di Pertua,**

Untuk makluman Yang Berhormat Shah Alam, Kementerian Wilayah Persekutuan (KWP) memberi perhatian khusus dalam menjaga kebajikan dan kemaslahatan warga Wilayah Persekutuan yang terkesan akibat penularan wabak COVID-19 serta penguatkuasaan Perintah Kawalan Pergerakan (PKP). Dalam hal ini, pihak KWP telah mengambil tindakan yang proaktif dengan memperkenal dan melaksanakan “Inisiatif Wilayah Cakna” (IWC) yang bertujuan untuk meringankan beban kewangan warga Wilayah Persekutuan terutamanya dari golongan B40 dan miskin.

Pelaksanaan Inisiatif IWC ini telah dibahagikan kepada 3 fasa seperti berikut:

- 1) IWC 1.0 daripada 25 Mac 2020 sehingga 30 Jun 2020;
- 2) IWC 2.0 daripada 1 Julai sehingga 30 September 2020; dan
- 3) IWC 3.0 daripada 10 Oktober sehingga 31 Disember 2020.

Penerima bantuan di bawah IWC adalah merangkumi 3 kluster utama iaitu:

- Kluster 1) pasukan petugas barisan hadapan (*frontliners*);
- Kluster 2) pesakit COVID-19 dan individu-individu yang sedang disiasat (*people under investigation – PUI*); dan
- Kluster 3) warga Wilayah Persekutuan.

Sebanyak RM108.64 juta telah dibelanjakan untuk fasa IWC 1.0 dan 2.0 manakala sebanyak RM41.8 juta pula telah diperuntukkan bagi pelaksanaan IWC 3.0. Keseluruhan kos dan peruntukan ini telah dan akan ditanggung sepenuhnya melalui peruntukan sedia ada KWP dan agensi-agensi di bawahnya, serta melalui sumbangan pertubuhan/institusi rakan strategik iaitu Agensi Pengurusan Bencana Negara (NADMA), Jabatan Agama Islam Wilayah Persekutuan (JAWI), Majlis Agama Islam Wilayah Persekutuan (MAIWP), Angkatan Pertahanan Awam Malaysia (APM) dan Yayasan Wilayah Persekutuan (YWP).

Kesemua inisiatif ini mencerminkan keprihatinan Kerajaan terhadap isu dan situasi yang getir ini. KWP akan terus melaksanakan program-program bantuan IWC secara bersama dengan komuniti Wilayah Persekutuan demi memutuskan rantai penularan COVID-19 serta menjadikan Wilayah Persekutuan sifar COVID-19, selain membantu meringankan beban yang dihadapi oleh rakyat di Wilayah Persekutuan Kuala Lumpur, Putrajaya dan Labuan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS TAHUN 2020**

**PERTANYAAN : BERTULIS**

**DARIPADA : YB TUAN KHOO POAY TIONG  
[KOTA MELAKA]**

**TUAN KHOO POAY TIONG [KOTA MELAKA] minta MENTERI SUMBER MANUSIA menyatakan :-**

- (a) anggaran jumlah pekerja tidak formal (iaitu tidak menerima perlindungan sosial/bantuan Kerajaan berkaitan pekerjaan) di Malaysia mengikut pecahan negeri; dan
- (b) apakah strategi dan langkah-langkah Kerajaan dalam masalah ini, khususnya dalam memastikan mereka menerima perlindungan dan bantuan sosial dalam situasi COVID-19.

**JAWAPAN**

Tuan Yang di-Pertua,

- Untuk makluman Ahli-Ahli Dewan Yang Mulia, berdasarkan rekod Skim Keselamatan Sosial Pekerjaan Sendiri (SKSPS) PERKESO, anggaran Orang Bekerja Sendiri (OBS) dalam sektor tidak formal yang belum mendapat perlindungan di bawah SKSPS, Akta Keselamatan Sosial Pekerjaan Sendiri 2017 [Akta 789] mengikut pecahan negeri di Malaysia adalah seperti di Jadual 1 berikut:

**Jadual 1: Bilangan OBS Mencarum Di Bawah SKSPS Berbanding Bilangan OBS Yang Belum Mencarum**

NEGERI	BIL OBS PERKESO SKSPS	JABATAN PERANGKAAN MALAYSIA		(B)-(A)
	BIL OBS (A)	('000)	BIL OBS (B)	
JOHOR	9,779	294,684	294,684	284,905
KEDAH	4,612	235,181	235,181	230,569
KELANTAN	1,675	206,461	206,461	204,786
KUALA LUMPUR	9,513	120,363	120,363	110,850
LABUAN	170	5,034	5,034	4,864
MELAKA	3,032	60,827	60,827	57,795
NEGERI SEMBILAN	2,830	71,377	71,377	68,547
PAHANG	3,531	147,114	147,114	143,583
PENANG	4,620	92,505	92,505	87,885
PERAK	6,135	197,961	197,961	191,826
PERLIS	1,073	26,000	26,000	24,927
SELANGOR	15,142	525,379	525,379	510,237
SABAH	4,737	414,481	414,481	409,744
SARAWAK	5,341	223,879	223,879	218,538
TERENGGANU	3,468	100,341	100,341	96,873
PUTRAJAYA	171	2,575	2,575	2,404
<b>JUMLAH</b>	<b>75,829</b>	<b>2,724,162</b>	<b>2,724,162</b>	<b>2,648,333</b>
Sumber:				
OBS (A)-1JAN- 1 DISEMBER 2020, PERKESO				
OBS (B)-2019, JABATAN PERANGKAAN				

2. Statistik sehingga 1 Disember 2020 jumlah OBS yang mendaftar dan mencarum dengan PERKESO ialah seramai 75,829 orang sahaja iaitu 2.78% sahaja manakala baki 2.64juta orang atau 97.22% masih belum mencarum dan tiada perlindungan di bawah SKSPS.
3. Di antara strategi dan langkah-langkah yang diambil oleh PERKESO bagi memastikan OBS mendapat perlindungan SKSPS ialah dengan mengadakan sesi libat urus dan turun padang yang melibatkan agensi kerajaan, platform penyedia perkhidmatan ekonomi gig, persatuan, pertubuhan dan sebagainya di semua pejabat PERKESO seluruh negara.
4. PERKESO turut mengadakan Memorandum Persefahaman (MoU) bersama beberapa agensi kerajaan dan platform penyedia perkhidmatan bagi memperluaskan perlindungan keselamatan sosial kepada OBS. Sepanjang tahun ini sebanyak 4,177 sesi libat urus telah diadakan di seluruh negara.
5. PERKESO turut melantik wakil daripada Jabatan / Agensi / Kesatuan sebagai Ejen Keselamatan Sosial Pekerjaan Sendiri (EKSPS) untuk menjadi Ejen Korporat yang bertanggungjawab ke atas OBS mengikut ketetapan di dalam terma dan syarat-syarat bagi maksud pungutan dan penerimaan bayaran caruman. EKSPS Ejen Korporat juga bertanggungjawab melaksanakan aktiviti promosi, publisiti dan pemudah cara bagi tuntutan faedah SKSPS.
6. Selain itu, PERKESO turut melaksanakan program publisiti meluas secara aktif melalui hebahan di media massa seperti di stesen TV dan radio serta di media cetak utama. PERKESO turut menerbitkan risalah dan klip-klip video yang disebar luas melalui media sosial di laman sesawang PERKESO, *Facebook*, *You Tube*, *WhatsApp* dan *Instagram*.

Sekian, terima kasih.